

Na osnovu člana 48. Statuta Udruženja poslodavaca u Federaciji Bosne i Hercegovine, Grupacija poslodavaca za djelatnost poslovnih servisa i IT pri Udruženju poslodavaca u Federaciji Bosne i Hercegovine donosi:

**POSLOVNIK
O ORGANIZACIJI I RADU
GRUPACIJE POSLODAVACA ZA DJELATNOST POSLOVNIH SERVISA I IT PRI UDRUŽENJU
POSLODAVACA U FEDERACIJI BOSNE I HERCEGOVINE**

I OPĆE ODREDBE

Član 1.

Ovim Poslovnikom uređuju se naziv, djelovanje, ciljevi, organizacija rada, način odlučivanja, izbor predsjednika, prava i obaveze članova, način rada stručnih tijela, kao i druga pitanja od značaja za rad Grupacije poslodavaca za djelatnost poslovnih servisa i IT pri Udruženju poslodavaca u Federaciji Bosne i Hercegovine (u daljem tekstu: Grupacija).

Član 2.

Grupacija je organizacioni oblik djelovanja članova Udruženja poslodavaca u Federaciji Bosne i Hercegovine (u daljem tekstu: Udruženje), osnovan radi zastupanja, usklađivanja i unapređenja interesa poslodavaca iz oblasti poslovnih servisa, informacionih tehnologija, digitalnih usluga, outsourcinga, savjetodavnih i drugih uslužnih djelatnosti.

Grupacija djeluje isključivo u okviru Udruženja i nema svojstvo pravnog lica.

Član 3.

Ciljevi i zadaci Grupacije naročito su:

- zastupanje interesa članova iz oblasti poslovnih servisa i IT sektora,
- praćenje i unapređenje regulatornog i poslovnog okruženja,
- pokretanje inicijativa prema nadležnim institucijama,
- učešće u procesima socijalnog dijaloga i ekonomskih reformi,
- razmjena informacija i iskustava među članovima,
- unapređenje konkurentnosti i digitalne transformacije privrede,
- promocija inovacija, digitalizacije i razvoja novih tehnologija,
- saradnja sa domaćim i međunarodnim institucijama i organizacijama,
- učešće u projektima, edukacijama i stručnim aktivnostima od interesa za članove,
- priprema prijedloga, mišljenja i analiza iz oblasti rada Grupacije.

Član 4.

Grupacija može, putem organa i stručne službe Udruženja, inicirati donošenje propisa, mjera i aktivnosti od značaja za razvoj sektora poslovnih servisa i IT djelatnosti.

Član 5.

Naziv Grupacije glasi:

Grupacija poslodavaca za djelatnost poslovnih servisa i IT pri Udruženju poslodavaca u Federaciji Bosne i Hercegovine.

Sjedište Grupacije je u sjedištu Udruženja.

II ČLANSTVO

Član 6.

Članovi Grupacije mogu biti pojedinačni i kolektivni članovi Udruženja koji obavljaju djelatnosti iz oblasti poslovnih servisa, informacionih tehnologija i srodnih djelatnosti.

Članstvo u Grupaciji je dobrovoljno.

Član 7.

Prijem i prestanak članstva u Grupaciji vrši se putem stručne službe Udruženja, u skladu sa Statutom Udruženja i internim aktima Udruženja.

Član 8.

Članovi Grupacije imaju pravo da:

- učestvuju u radu Grupacije,
- predlažu inicijative, zaključke i preporuke,
- budu informisani o radu i aktivnostima Grupacije,
- učestvuju u stručnim i konsultativnim aktivnostima,
- predlažu pitanja od značaja za sektor.

Članovi Grupacije dužni su:

- djelovati u skladu sa Statutom i aktima Udruženja,
- poštovati profesionalne i etičke standarde,
- doprinositi ostvarivanju ciljeva Grupacije,
- saradivati sa drugim članovima i organima Udruženja.

III ORGANIZACIJA I RAD GRUPACIJE

Član 9.

Grupacija djeluje kao stručno i konsultativno tijelo unutar Udruženja.

Grupacija nema Skupštinu, Upravni odbor niti druga posebna tijela upravljanja.

Član 10.

Radom Grupacije rukovodi predsjednik Grupacije.

Predsjednika **Grupacije imenuje Upravni odbor Udruženja poslodavaca u FBiH, na prijedlog članova Grupacije ili organa Udruženja.**

Mandat predsjednika traje četiri godine, uz mogućnost ponovnog imenovanja.

Član 11.

Predsjednik Grupacije:

- predstavlja i zastupa Grupaciju unutar Udruženja,
- koordinira rad i aktivnosti Grupacije,
- saziva i vodi sastanke Grupacije,
- predlaže inicijative, zaključke i aktivnosti,
- koordinira saradnju sa organima Udruženja,
- predstavlja stavove Grupacije prema nadležnim institucijama putem Udruženja,
- predlaže formiranje stručnih komisija i radnih grupa.

Član 12.

Za razmatranje pojedinih stručnih pitanja predsjednik Grupacije može predložiti formiranje komisija, radnih grupa ili ekspertnih timova.

Komisije i radne grupe imaju savjetodavnu i stručnu funkciju.

Član 13.

Sastanci Grupacije održavaju se prema potrebi, na inicijativu predsjednika Grupacije, članova Grupacije ili organa Udruženja.

Sastanci se mogu održavati uživo ili elektronskim putem.

Član 14.

Grupacija svoje prijedloge, inicijative, mišljenja i preporuke usvaja konsenzusom prisutnih članova, a u slučaju potrebe i većinom glasova prisutnih članova.

Usvojeni zaključci dostavljaju se organima Udruženja radi daljeg postupanja.

Član 15.

Rad Grupacije je javan.

Informacije o radu Grupacije mogu se objavljivati putem službenih kanala komunikacije Udruženja.

IV STRUČNA I ADMINISTRATIVNA PODRŠKA

Član 16.

Stručne, administrativne i tehničke poslove za potrebe Grupacije obavlja stručna služba Udruženja.

V FINANSIRANJE

Član 17.

Rad Grupacije finansira se iz sredstava Udruženja, projekata, donacija i drugih izvora u skladu sa Statutom i aktima Udruženja.

Grupacija nema poseban budžet niti finansijsku samostalnost, osim ako organi Udruženja drugačije ne odluče.



VI ZAVRŠNE ODREDBE

Član 18.

Izmjene i dopune ovog Poslovnika vrše se na način i po postupku predviđenom za njegovo donošenje.

Član 19.

Ovaj Poslovnik stupa na snagu danom usvajanja od strane nadležnog organa Udruženja poslodavaca u Federaciji Bosne i Hercegovine.

P R E D S J E D N I K